



2024-imut aningaasanut inatsisissatut siunnersuut.

(Aningaasaqarnermut Akileraarnermullu Naalakkersuisut)

(Aappassaaneerpeqarnera)

Nassuitsumik oqaaatigisariaqarpara. Naalakkersuisut nukissaarupput. IA-kkut nukissaarupput. Tupaatigisorujussuudara, amerlanerussuteqartumik naalakkersuisoqatigiit, maannakkut siuttugut, isummernissaminnut ersinerujussuat. Anguniagaqarnissaminnut takorluugaqarnissaminullu tunuarsimaarnerat. Pissaaneqarnissaq toqqarsimavarsi. Pisussaaffigalugulu akisussaaffigaarsi atussallugu. Sapiissuseqanngissusersi innuttaasunut tuppoq.

Ukiut marluk sinnerlugit nunatsinni IA siuttoralugu tusaajuartarsimavarput, naalakkersuinermi patajaannerusumik ingerlatsisoqassasoq, ingerlatallu pingaarutillit arlallit aqqissuuteqqinneqassasut. Ajoraluartumilli eqqortoq unaavoq, iliuseqartoqarsimangilaq. Naalakkersuisuni pitsaasumik ingerlatsineq amigartutut ippoq.

Naatsumik aallaqqaatigilara patajaassutsimik oqarluartaarsimaneq. IA-mut illersuilluinnartorluunniit kinaluunniit oqarsinnaangilaq, patajaattumik ingerlasoqarsimasoq. Uanga nammineq kisikkunnaarnikuuakka, Naalakkersuisuni qasseriarlutik paarlaassimanerit, qanorlu akulikitsigisumik akisussaaffiit paarlaassorneqarsimaneeri. Tupinnaannartumik suliat torinngipput. Tassa allatut taaneqarsinnaangilaq aqutsinerlunneq.

Aaqqissuusseqqiinerlut tunngatillugu aamma taama ajortigaaq. Aalisarnermut inatsisissaq aamma kinguartinneqareerpoq. Akileraarnermut aqqissuusseqqiineq uninngavoq, qaqugulu akileraarnermut aqqissuusseqqiineq piviusunngussanersoq ilimanangilluinnarluni. Naalakkersuisut inissiatileqatigiinnut naalliuttunut tapiissutissatut 5 millioner koruuningajannik immikkoortitsisimapput, tamaaliornerullu ersersippaa, uani 2023-imi ineqarnermut aqqissuusseqqiinerlut takujunnaangitsugut. Tamannalumi aamma sulisumaqatiginninniutigineqanngilaq. Taavalu ilinniartitaanermit aqqissuusseqqiineq isertuussaq, Naalakkersuisut Siulittaasuata ammaalluni oqalugiarnermi eqqaasaa. Taannalu aamma SULI isumaqatiginninniutigineqarsimangilaq.

Ukorsiaa; tamanna pitsaangilluinnarpoq. Nassuitsumik oqaatigissagaanni kipiluttunarpoq. Tamakkuli IA-mi Siumumilu politikkerinut tussangillat, eqqisseqqinnaarlutik assatik issiaviliullugit issiarujoorsinnaapput. Akerlianilli aalisartutsinnut tamanut tussapput, sulis nalorninermittuarsinnassagamik. Peqqinnissaqarfimmi sulisorisatsinnut tamanut tussapput, ullut tamaasa isumassuillutillu paaqqinnillutik suleruluttunut. Kikkunnut tamanut tussapput, attartukkani najugaqartunut, ilisimanagu imaluunniit qaqugu ineqarnerminnut akiliutimik qaffanneqarnissaannik sianigisaqanngitsunut ilisimasaqanngilluinnartunullu, qanoq inigisartik pisariaqarluinnartumik aserfallatsaalineqassanersoq. Aammattaaq innuttaasunut tamanut tussaaq, akitsuutinut akileraarutinullu annertuallaamik sulis akiliisarnissaq.



Uani naatsumik eqqaasariaqarpakka immikkut isertitassat, Naalakkersuisut poortuutinit akitsuutini isertitassatut naatsorsuutigisaat. 100 millioner koruunit missaaniittut pineqarput, isertitassallu pineqarlutik Naalakkersuisut siusinnerusukkut isertissimanngisaat. Teknikkitaanut isernaveersaassaaga, paasitiinnarusulluguli, imaaliallaannarluni tassanngaannaq akitsuutinit immikkut 100 millioner koruuninik isertitsisoqarsinnaanngimmat. Aatsaat 100 millioner koruuninik isertitsisoqarsinnaavoq akitsuutit qaffallugit innuttaasut kaasarfiinit aallernikkut. Taamannarlunnarluna, Naalakkersuisut iliorlutik aallartittut. Ingasappallaaqaq, ammanerusumik tamanna oqaluuserineqanngimmat.

Taamatut oqaaseqarpunga assersuusiorniaannarlunga, qanoq anguniagaqanngitsigisunik isumassarsinnaanngitsigisunillu Naalakkersuisoqarnersugut.

Aningaasarnermut inatsisissatut siunnersuut aamma taamaappoq. Anguniakkanik naammattunik soqanngilaq. Aaqqissusseqqiiinernik soqanngilaq.

Suli ersarissumik pilersaarummik amigaateqarpunga, qanoq aammalu qanoq sukkatigisumik, pisortat allaffissorneranut aningaasartuutit qaffakkaluttuinnartut appartinnissaannut. Suli ersarissumik pilersaarummik amigaateqarpunga, qanoq ililluta innuttaasut pisortanut akiitsui appartissinnaanerigut akiitsuisalu qaffannissaannut qanoq pinaveersaartitsisinnaanersugut. Suli ersarissumik pilersaarummik amigaateqarpunga, qanoq ililluni namminersortut suliassaasa annertusinissaat qulakkeerniarneqarnersog. Suli ersarissumik pilersaarummik amigaateqarpunga, qanoq ersarissumik inuiaqatigiit aningaasaatai amerlissinnaanerigut soorlu assersuutigalugu takornariaqarneq imaluunniit aatsitassarsiorneq naatsorsuutigalugit.

Aamma pilersaarut amigaatigaara, qanoq kalaaleq pisuunnguallatsinneqarsinnaanersog. Kissaatigaara, innuttaasutta nammineq aningaasaatiminnik annerusumik pigisaqarnissaat 100 millioner koruuninik poortuutinit akitsuutinut akiligassinneqarnernit.

Akileraarutinut- aamma akitsuutinut uagut Demokraatiniit iliuusererusutagut oqaatigilaarlakka. Isertitat aallaavigalugit akileraarut apparterusupparput. Tamanna pissaaq inummut ilanngaatiq qaffanneratigut, sulinermut ilanngaatiq qaffanneratigut akileraartarnermullu procentip appartinneratigut. Sukkunut akitsuut 2019-imi akitsuutit qaffanngikkallarneranni akiumumut uterteqqissavarput. Poortuutinut nutaanik akitsuusiinissaq naaggaarparput Naalakkersuisut nipaarullutik innuttaasut kaasarfianniit tiguniarsarisaat.

Kikkut tamarmik ilisimassavaat, eqqussinermi akitsuummik peqarusunnginnatta, moms-imik imaluunniit VAT-mik. Uagullu pilluta Naalakkersuisut taakku pillugit misissuinini unitsiinnartariaqarpaa. Tamakkununga tapersiunnaangilagut, nunatsinni kusanartumi inuunermik najugaqarnermillu akisunerulersitsissamat.

Aningaasanut inatsisissatut siunnersuut suli inerneqanngitsutut isigaarput, maannakkullu isummerfigiuminaappoq, isumaqatigiissinnaanersugut.

Pitsaavorli, aningaasanik atugassaqarmat. Aningaasanut inatsit akuerissagutsigu maannakkutut itsillugu, sinneqartooruteqassaaq 244 millioner koruuninik ukiullu sisamat siumut isigissaaanni sinneqartoorut katillugit milliard ataatsimik annertussuseqassalluni.



Sinneqartoorut innuttaasunut iluaqutaasariaqarpoq. Uanilu aamma amigaatigaakkaasit Naalakkersuisunit aningaakkat isumassarsiallu. Peqqinnissaqarfik pitsanngorsassavarput? Ilinniartitaanermut aningaasaleeqqissaagut? Meeqqat sumiginnarneqarnerannut akiuiniarnermut aningaasaliisoqaqqissava? Innuttaasut namminneq aningaasaatiminnikannertunerusumik tigumminninnissaat qulakkeerniassavarput akileraartarnerup- aamma akitsuusiisarnerup appartinnerisigut? Imaluunniit suna?

Kialluunniit ilisimanngilaa, Naalakkersuisoqaratta tulleriarisinnaanngitsunik isummersorsinnaanngitsunillu.

Neriuppunga, isumaqatiginninniarnertit tulluuttut ingerlaneranni tamanna allannguuteqassasoq. Innuttaasut pillugit.

Isumaqatiginninniarnertit qilanaaraagut toqqaannartumik Aningaasaqarnermut- aamma Akileraartarnermut Naalakkersuisumut aammalu Akileraartarnermut ataatsimiititaliamut, siunnersuullu tassunga ingerlatinneqarpoq.